



24. September 2026

UKA2026/232

Inuit innarluutillit ikiorserneqarnissaat pillugu Inatsisartut inatsisissaattut siunnersuut.
(Peqqissutsimut inunnnullu Innarluutilinnut Naalakkersuisoq)

Siumup Naalakkersuisut siunnersuummik matuminnga saqqummiussinerannut qutsavigai.

Pilersikkumavagut inuiaqatigiit kikkunnut tamanut pitsaasumik naligiimmillu atugassaqaqtitsisut.

Inuit pisinnaatitaaffii nunarsuarmioqatigiinnut tamanut atuuttut illersussallugit pingaartitaraagut.

Siumumut pingaaruteqarpoq inuit innarluutillit pisinnaatitaaffiisa tunngaviusumik qulakkeerneqarnissaat, aammalu kikkut tamarmik inuiaqatigiinni peqataanissamut naligiimmik periarfissaqarnissaat. Tamanna inunnut takuneqarsinnaasumik takuneqarsinnaanngitsimillu innarluutilinnut atuuppoq, ikiuinerlu inuit ataasiakkaat pisariaqartitaanik najukkamilu pissutsinik aallaaveqassaaq.

Taamaattumik pitsaasutut isigaarput siunnersuut ilaatigut inuusuttut innarluutillit inersimasunngoreernerminni malitseqartitsivigineqarnissaannut, qanigisaasunit paarineqarsinnaanissaannut kiisalu najugaqarfimmut qaninnerusumi ulloq unnuarlu neqeroorutininik pilersitsinissamut pitsaanagerusunik periarfissiimmat. Tamanna toqqissisimanerulernissamut aammalu ilaqtutanut najukkamilu inuiaqatigiinnut attaveqarnerup attatiinnarnissaanut iluaqutaasinnaavoq.

Siumumut aamma pingaaruteqarpoq inuit innarluutillit ilinniagaqarnissamut, suliffeqarnissamut sapinngisamillu nammineerlutik inuunissamut pitsaanagerusunik periarfissaqarnissaat. Inissianik najugaqarfissanillu naleqquttunik peqartariaqarpoq, angajoqqaallu qanigisaasullu pisariaqartitaminnik siunnersorneqarlutillu ikorfartorneqartariaqarput.

Inatsisitigut pitsaasunik pisinnaatitaaffiliineq piviusunngortinneqassappat sulisunik ilinniarsimasunik piginnaasaqarluartunillu peqarnissaaq aamma pisariaqarpoq. Taamaattumik innarluutilinnut tunngasuni sulisut piginnaasaminnik qaffasaanissamut pitsaanagerusunik periarfissaqartinneqassapput, aammalu sulisut ilinniarsimasut amerlanerulernissaat sulissutigineqassaaq. Tamanna aamma meeqqerivinnut atuuppoq, tassani innarluutit pillugit ilisimasaqarneq siusissukkullu iliuuseqarneq meeqqanut ilaqaataannullu annertuumik pingaaruteqarsinnaammat.

Siumut aamma isumaqarpoq innarluutit takuneqarsinnaanngitsut pillugit annertunerusunik paasinnittoqalernissaa pingaaruteqartoq. Kikkut tamarmik pisariaqartitaat piviusut aallaavigalugit pineqassapput - innarluut takuneqarsinnaanersoq takuneqarsinnaannginnersorluunniit apeqqutaatinngagu.

Taamattaaq eqqaanngitsoorusunngilarput utoqqaat ilaat ukioqqortusitillutik innarluuteqalersarmata taakku aamma suliniuteqarnermi mininneqannginnissaat eqqaamaneqassasoq, tassami



imaaginnanngimmat utoqqalineq tamatigut nungullarnermik kinguneqartartoq, peqquteqartarpulli ilai ersinngitsumik innarluuteqalersarlutik ilaallu timimikkut pitsorlussinikkut innarluuteqalersarlutik.

Peqatigisaanik inatsisissatut siunnersuutip aningaasaqarnikkut kingunerisassai pillugit ernumassutit maluginiarpavut. Kommunit suliaassanik isumaginninnissamut piviusunik periarfissaqarnissaat pingaaruteqarpoq, aammalu inatsisip atuutilersinneqarnerani Namminersorlutik Oqartussat kommunillu qanimut suleqatigiinnissaat pisariaqarpoq. Pisariaqarporlu aningaasatigut kingunerisassat kommuuninit aarleqqutigineqartut ataatsimiititaliami qulaajaavigilluarnissaat

Taamaattumik aamma pingaaruteqartipparput inatsit atuutilerneranit kingusinnerpaamik ukiut marluk qaangiunneranni nalilersorneqassasoq, taamaalilluta pisinnaatitaaffiit nutaat inuit innarluutillit ilaqutaasalu atugaannik piviusumik pitsanngoriaateqartitsinersut takusinnaajumallugit.

Siumumut innarluutilinnut politikki naligiissitaanermik, nammineq aalajangiisinnatitaanermik ataatsimoornermullu peqataanissamut pisinnaatitaanermik tunngaveqarpoq. Anguniagaassaaq inuit innarluutillit pisariaqartitaminnik ikiorserneqarnissaat aammalu ataqqinartumik isumaqarluartumillu inuunissamut allat assigalugit periarfissaqarnissaat.

Taamatut oqaaseqarluta Siumumiit siunnersuutit peqqissutsimut ilaqutariinnullu ataatsimiititaliamut ingerlanneqarnissaa innersuussutigaarput.

Qujanaq.